

Fasnacht 2017 „Mir luege nid ewägg“

Do stuunet ihr, was will wool dä Kardinal,
Benedetto heiss ych und bi eigentlich ganz normal.
E Heimweebasler uns färne Lande,
Ha my Läbe meer oder weniger g'stande.
Doch zu däm Fescht, y has nid kenne loo,
Han y nadyyrlig nach Basel miesse koo!

S Süschee isch „Mir luegen ewägg“ . So wänn mir aber nach jedem
Gongschlag zämme statt „Mir luegen ewägg“ schreie: „Mir luege nid
ewägg“ . Probiere mir doch das emool:

Alli: Gong - Mir luege nid ewägg! Nomool – Mir luege nid ewägg.

Also loos goot's...

In nomeni patri et filii et spiritus sancti

(Do seit me eigentlich Amen - Also hör y öbbis...)

Hänner verstande, ihr liebe Lüt?
Es isch nid dä Spiritus won ihr dängget.
Es isch au nid s vierzigscht Gloggeglüt,
Sondern Zyt um euch jetzt e paar Värslis z schängge!

Hitt deerfe mer aaneluege und's gniesse
Fyyre und nid d'Schnuure halte miesse!
40 Johr isch e langi Zyt
Grau simmer worde und d'Hose z äng oder gar z wyt.

Also:

My Ex-Chef, dr Ratzinger mit geballter Kraft,
Loot e Kirche zrug, wo ooni Saft,
D Mensche überseet und über sy wacht,
Die Schwuule, es isch schauderhaft
Elai loot mit ihrer Lyydeschaft!
Doch glüggligerwyys hetter's nid gschafft,
Sy beschts Stigg isch erschlafft
Und jetzt hoff y, hänn's die Schwuule ändlig gschafft!

Gong – mir luege nid ewägg - alli

Es isch scho emool passiert - in Berlin
Wo Mensche hinter de Muure sich hän miesse versteppe.
E gwisser Trump het e glyyche Spleen.
Mexikaner mien no blääche das umsverregge!
Jo: Diktatoore an d Macht!
So glaube einigi, die Wält welle z rette.
Si mache so lang, bis es wirgglig kracht
Und Millioone Mensche – wo au immer – verregge!

Si heisse Trump, Le Pen, Assad oder Erdoğan,
Stopfe de Mensche und de Medie s Muul
Und finde sich – es isch grotesgg
Sich sälber no waansinnig cool!

Gong – mir luege nid ewägg - alli

Jo, Populische hän mir gnueg, au in de eigene Reihe,
Drum isch es wichtig, ane z luege und nid z gääne.
Deene s Muul stopfe - si zur Räson z bringe,
Nid ewägg luege und trotzdem Schwyzerhymne singe!
Jo, de kasch wirgglig nid ewägg luege!
Muesch uf d Barrikade und s Muul uffrysse.
Sunscht bricht die Wält tatsächlich uss de Fuege
Und zrugg blybt e glaine, bluetige Sprysse!

Gong - mir luege nid ewägg - alli

Es isch nid eifach, Färsli z brünzle in dr hüttige Zyt,
Wo's glepft und kracht und Mensche verregge.
Ewägg luege könne mir nid, ihr liebe Lyt,
Aber Friide stifte doo bi uns und um en Egge.
Y weiss, vyyl versteen bald nimme unseri Sprooch,
Schlitzauge hänn sy, schwarz sinn sy und mänggmool sinn sy is au z
noch!

Aber au sii sinn Mensche wie du und yych
Hänn Sorge und Seergeli – es isch mir nid glyych!
Drumm mien mir ys arrangiere, ob mir wänn oder nid,
Sy integriere – das wär en erschte Schritt!
Und wenn sy dumm und dümmer dien,
Unseri Fasnacht gar ins Lächerlige ziehn,
Denn gitt's nyt anders als e Schutt in Arsch,
Sy an d Gränze stelle und denn Marsch, Marsch!

Gong – mir luege nid ewägg - alli

Weiss dr Daifel, was in unserer Kirche no alles kunnt,
Wo s Personal sich d Hagge ablauft, bis sy sinn wund.
Doch no lauft alles – so het me s Gfyyt – ganz rund
Doch iberaal fäält dr jungi Spunt
Wo das läbt, won er sait au wenn's mängmool isch bunt.
Es wär höggschti Zyt, wenn nid sogar bald die letschti Stund!
Denn Hyroote, Taufe, Beärdige im Galopp
Wiehnachte, Ooschdere, Pfingschde hopedihop,
Gottesdienst und Predigde ganz salopp
Und bi dr Seelsorg heisst's denn pletzlich Stop!
Nai, das kaas nid syy, do luege mir nid ewägg.
Im Moment villicht dient's sim Zwägg.
Doch uf Duur uuse muess ändlig ebbis passiere,

Verhüürooteti Prieschter, Diakonissinne, Prieschterinne mien regiere.
Gott het Mensche **beruefe**, egal welles Gschlächt.
Und y glaub, das wär Gott und uns allne rächt!

Gong – mir luege nid ewägg - alli

Doch jetzt wänn mir kei Truebsaal bloose,
Sunscht goot bigoscht d Fasnacht no in d Hoose!
Nai, dr Optimismus und s Lache deerfe mir nid verliere,
Gwissi Sache mien mir eifach akzeptiere!
Schliesslig wänn Kinder und mir alli zämme
Fasnacht fyyre kenne ohni z flänne.
Drum sag ych allne mit breiter Bruscht,
Jo, ihr glaubet's kuum, doch ych ha Luscht
Als Kardinal ooni Fruscht und ganz bewusst:
Kei Fasnacht wär au fir mii dr greescht Verluscht.

Gong – mir luege nid ewägg – alli

Zyt nagt an unsere Knoche,
Do sticht's im Buch und deert im Kopf.
So langsam bin ych en alte Knoche,
Ych wird halt alt und älter, ych alte Sogge!

Au do ewägg luege macht kei Sinn,
Jeede Daag gniesse, das isch dr einzig Wääg.
Lifte, Botox, y glaub y spinn
Au ooni das bin yych im Alter zwääg!

Doch Zyt isch koo, adiee z sage
Ich kaa's nid verheelee, es duet sau wee.
Doch was mir Geistlige au mien trage,
Mir trages und hoffe uf es Wiedersee!

Gong mir luege nid ewägg

Und jetzt sag y's letscht Mool do vo dr Kanzle:

In nomeni patri et fili et spiritus sancti

Alli: A M E N